

四庫全書

史部

欽定四庫全書

史部
明史卷八至

內閣中書_臣瞿照覆勘

總校官編修_臣朱鈴

欽定四庫全書

明史卷四

大學士張廷玉等奉 勅修

本紀第四

恭閔帝

恭閔惠皇帝諱允炆太祖孫懿文太子第二子也母妃呂氏帝生穎慧好學性至孝年十四侍懿文太子疾晝夜不暫離更二年太子薨居喪毀瘠太祖撫之曰而誠

純孝顧不念我乎洪武二十五年九月立為皇太孫二十九年重定諸王見東宮儀制朝見後於內殿行家人禮以諸王皆尊屬也初太祖命太子省決章奏太子性仁厚於刑獄多所減者至是以命太孫太孫亦復佐以寬大嘗請於太祖遍考禮經參之歷朝刑法改定洪武律畸重者七十三條天下莫不頌德焉三十一年閏五月太祖崩辛卯即皇帝位大赦天下以明年為建文元年是日葬高皇帝於孝陵詔行三年喪羣臣請以日易

月帝曰朕非效古人亮陰不言也朝則麻冕裳退則齊衰杖經食則饘粥郊社宗廟如常禮遂命定儀以進丙申詔文臣五品以上及州縣官各舉所知非其人者坐之六月省并州縣革冗員戶部侍郎卓敬請徙封燕王棣於南昌不聽以兵部侍郎齊泰為本部尚書翰林院修撰黃子澄為太常卿同叅軍國事召漢中府教授方孝孺為翰林院侍講秋七月詔行寬政赦有罪蠲逋賦八月廢周王橚橚子有勦告橚謀不軌命李景隆執之

廢為庶人徙雲南勅魏國公徐輝祖練兵山東以備燕
詔興州營州開平諸衛軍全家在伍者免一人天下衛
所軍單丁者放為民九月雲南總兵官西平侯沐春卒
於軍詔左副將何福代領其衆冬十一月以工部侍郎
張昺為北平布政使謝貴張信掌北平都指揮使向察
燕陰事詔求直言舉山林才德之士十二月癸卯何福
破斬刀幹孟麓川平是月賜天下明年田租之半釋黥
軍及囚徒還鄉里是年暹羅占城入貢

建文元年春正月癸酉受朝不舉樂庚辰大祀天地於
南郊奉太祖配修太祖實錄二月追尊皇考曰孝康皇
帝廟號興宗妣常氏曰孝康皇后尊母妃呂氏曰皇太
后冊妃馬氏為皇后封弟允熲為吳王允熲衛王允熙
徐王立皇長子文奎為皇太子詔告天下舉遺賢賜民
高年米肉絮帛鰥寡孤獨廢疾者官為牧養重農桑興
學校考察官吏振罹災貧民旌節孝瘞暴骨蠲荒田租
衛所軍戶絕者除勿勾詔諸王毋得節制文武吏士更

定內外大小官制三月擇奠於先師孔子罷天下諸司不急務勅都督宋忠徐凱耿璘帥兵屯開平臨清山海關調北平永清二衛軍於彰德順德命刑部尚書暴昭戶部侍郎夏原吉等二十四人充採訪使分巡天下甲午京師地震求直言御史尹昌隆言奸臣專政陰盛陽微是以地震忤執政貶福寧知縣尋召還夏四月或告湘王柏齊王搏代王桂反柏懼自焚死廢搏桂為庶人遣燕王世子高熾及其弟高煦高燧還北平北平按察

僉事湯宗上變告按察使陳瑛受燕王金通密謀逮瑛
廣西安置六月西平侯沐晟奏岷王梗過惡廢為庶人
徙漳州己酉燕山護衛百戶倪諒上變燕旗校於諒等
伏誅詔讓燕王棣逮王府官僚棣稱疾都指揮張信叛
附於燕秋七月癸酉燕王棣誘殺布政使張昺都指揮
謝貴遂舉兵反長史葛誠護衛指揮盧振伴讀余逢辰
死之叅政郭資副使墨麟僉事呂震等降於燕棣上書
請入清君側指揮馬宣走薊州俞瑱走居庸宋忠趨北

平聞變退保懷來通州遵化密雲相繼降燕丙子燕兵陷薊州馬宣戰死己卯燕兵陷居庸關甲申陷懷來宋忠俞瑱被執死都指揮彭聚孫泰力戰死永平指揮郭亮等叛降燕壬辰谷王穗自宣府奔京師命長興侯耿炳文為征虜大將軍駙馬都尉李堅都督甯忠為左右副將軍師討燕祭告天地宗廟社稷削燕屬籍詔曰邦家不造骨肉周親屢謀僭逆去年周庶人橚僭為不軌辭連燕齊湘三王朕以親親故止正櫛罪今年齊王

搏謀逆又與棟柏同謀柏伏罪自焚死搏已廢為庶人
朕以棟於親最近未忍窮治其事今乃稱兵構亂圖危
宗社護罪天地祖宗義不容赦是用簡發大兵往致厥
罰咨爾中外臣民軍士各懷忠守義與國同心掃茲逆
氛永安至治尋命安陸侯吳傑江陰侯吳高都督耿璈
都指揮盛庸潘忠楊松顧成徐凱李友陳暉平安分道
並進置平燕布政使司於真定以尚書暴昭掌司事八
月己酉耿炳文兵次真定徐凱屯河間潘忠楊松屯鄭

州壬子燕兵陷雄縣潘忠楊松戰於月漾橋被執鄭州陷壬戌耿炳文及燕兵戰於滹沱河北敗績李堅寧忠顧成被執炳文退保真定燕兵攻之不克引去召遼王植寧王權歸京師植渡海還朝改封荊州權不至詔削護衛丁卯以曹國公李景隆為征虜大將軍代耿炳文九月戊辰吳高耿璫楊文帥遼東兵圍永平戊寅景隆兵次河間燕兵援永平吳高退保山海關冬十月燕兵自劉家口間道襲陷大寧守將朱鑑死之總兵官劉真

都督陳亨援太寧亨叛降燕真由海道遁還京師燕執
寧王權奪其衆及朶顏三衛卒歸北平辛亥李景隆圍
北平燕兵還救十二月辛未李景隆及燕兵戰於鄭村
壩敗績奔德州諸軍盡潰燕王棣再上書於朝帝為罷
齊泰黃子澄官仍留京師

二年春正月丙寅朔詔天下來朝官勿賀丁卯釋奠於
先師孔子二月燕兵陷蔚州進攻大同李景隆自德州
赴援燕兵還北平保定知府雒僉叛降燕甲子復以都

察院為御史府均浙江田賦詔曰國家有惟正之供江浙賦獨重而蘇松官田悉準私稅用懲一時豈可為定則今悉與減免畝毋踰一斗蘇松人仍得官戶部三月丙寅朔日有食之賜胡廣等進士及第出身有差夏四月李景隆會武定侯郭英安陸侯吳傑等進次白溝河己未及燕兵戰都督平安瞿能敗之棣以三騎遁明日復戰又敗之日晡景隆敗績都督瞿能越雋侯俞淵指揮滕聚等皆戰死景隆奔德州五月辛未奔濟南燕兵

陷德州遂攻濟南庚辰景隆敗績於城下南走參政鐵鉉都督盛庸悉力禦之六月己酉遣尚寶丞李得成諭燕罷兵棣不奉詔得成叛降燕秋八月癸巳承天門災詔求直言改謹身殿為正心殿午門為端門端門為應門承天門為臯門前門為路門戊申盛庸鐵鉉擊敗燕兵濟南圍解復德州九月詔錄洪武中功臣罪廢者後辛未封盛庸歷城侯擢鐵鉉山東布政使叅贊軍務尋進兵部尚書以庸為平燕將軍都督陳暉平安副之庸

屯德州平安及吳傑屯定州徐凱屯滄州冬十月詔李
景隆還赦不誅戊午燕兵襲滄州徐凱被執十二月甲
午燕兵犯濟寧薄東昌乙卯盛庸擊敗之斬其將張玉
丙辰復戰又敗之燕兵走館陶庸軍勢大振檄諸屯軍
合擊燕絕其歸路

三年春正月辛酉朔凝命神寶成告天地宗廟御奉天
殿受朝賀乙丑吳傑平安邀擊燕兵於深州不利辛未
大祀天地於南郊丁丑享太廟告東昌捷復齊泰黃子

澄官三月辛巳盛庸敗燕兵於夾河斬其將譚淵再戰不利都指揮莊得楚智等力戰死壬午復戰敗績庸走德州丁亥都督何福援德州癸巳竄齊泰黃子澄密令募兵於外諭燕罷兵閏月己亥吳傑平安及燕戰於藁城敗績還保真定燕兵掠真定順德廣平大名棣上書請召還諸將息兵遣大理少卿薛嵩報之是月禮制成頒行天下五月甲寅盛庸以兵扼燕餉道不克棣復遣使上書下其使於獄六月壬申燕將李遠寇沛縣焚糧

艘壬午都督袁宇邀擊之敗績秋七月己丑燕兵掠彰德丁酉平安自真定攻北平壬寅大同守將房昭帥兵由紫荆關趨保定駐易州西水寨九月甲辰平安及燕將劉江戰於北平敗績還保真定冬十月丁巳真定諸將遣兵援房昭及燕王戰於齊眉山敗績十一月壬辰遼東總兵官楊文攻永平及劉江戰於昌黎敗績己亥平安敗燕將李彬於楊村十二月癸巳燕兵焚真定軍儲詔中官奉使侵暴吏民者所在有司繫治是月命駙

都尉梅殷鎮淮安太祖實錄成

四年春正月甲申召故周王曄於蒙化居之京師燕兵
連陷東阿東平汶上兗州濟南東平吏目鄭華濟陽教
諭王省皆死之甲申魏國公徐輝祖帥師援山東燕兵
陷蕭沛沛縣知縣顏伯瑋主簿唐子清典史黃謙蕭縣
知縣鄭恕死之癸丑薄徐州二月甲寅都督何福及陳
暉平安軍濟寧盛庸軍淮上己卯更定品官勲階三月
燕兵攻宿州平安追及於肥河斬其將王真遇伏敗績

宿州陷夏四月丁卯何福平安敗燕兵於小河斬其將
陳文甲戌徐輝祖等敗燕兵于齊眉山斬其將李斌燕
兵懼謀北歸會帝聞訛言謂燕兵已北召輝祖還何福
軍亦孤庚辰諸將及燕兵大戰於靈璧敗績指揮宋瑄
力戰死陳暉平安禮部侍郎陳性善大理寺卿彭與明
皆被執五月癸未楊文帥遼東兵赴濟南潰於直沽已
丑盛庸軍潰於淮上燕兵渡淮下泗水盱眙兵部主事
樊士信死之趨揚州指揮王禮等叛降燕御史王彬指

揮崇剛死之辛丑燕兵至六合諸軍迎戰敗績壬寅詔
天下勤王遣御史大夫練子寧侍郎黃觀修撰王叔英
分道徵兵召齊泰苗子澄還蘇州知府姚善寧波知府王
璉徽州知府陳彥回樂平知縣張彥方前永清典史周
縉各起兵入衛甲辰下詔罪已遣慶成郡主如燕師議
割地罷兵六月癸丑盛庸帥舟師敗燕兵於浦子口復
戰不利都督僉事陳瑄以舟師叛附於燕乙卯燕兵渡
江盛庸戰於高資港敗績戊午鎮江守將童俊叛降燕

庚申燕兵至龍潭辛酉命諸王分守都城遣李景隆及兵部尚書茹瑺都督王左如燕軍申前約壬戌復遣谷王穗安王楹往皆不聽甲子遣使齎蠟書四出促勤王兵乙丑燕兵犯金川門左都督徐增壽謀內應伏誅谷王穗及李景隆叛納燕兵御史連楹叩馬欲刺棣被殺都城陷宮中火起帝不知所終棣遣中使出后屍於火詭云帝屍越八日壬辰用學士王景言備禮塋之或云帝由地道出亡正統五年有僧自雲南至廣西詭稱

建文皇帝思恩知府岑瑛聞於朝按問乃鈞州人楊行祥年已九十餘下獄閱四月死同謀僧十二人皆戍遼東自後滇黔巴蜀間相傳有帝為僧時往來跡正德萬歷崇禎間諸臣請續封帝後及加廟謚皆下部議不果行

大清乾隆元年

詔廷臣集議追謚曰恭閔惠皇帝

贊曰惠帝天資仁厚踐阼之初親賢好學召用方孝孺

等典章制度銳意復古嘗因病晏朝尹昌隆進諫即深
自引咎宣其疏於中外又除軍衛單丁減蘇松重賦皆
惠民之大者乃革命而後紀年復稱洪武嗣是子孫臣
庶以紀載為嫌草野傳疑不無訛謬更越

聖朝得經論定尊名壹惠君德用彰懿哉

欽定四庫全書

明史卷五

大學士張廷玉等奉 勅修

本紀第五

成祖一

成祖啟天弘道高明肇運聖武神功純仁至孝文皇帝
諱棣太祖第四子也母孝慈高皇后洪武三年封燕王
十三年之藩北平王貌奇偉美髯髯智勇有大略能推

誠任人二十三年同晉王封鼎爾布哈晉王怯不敢進
王倍道趨伊都山獲其全部而還太祖大喜是後屢帥
諸將出征並令王節制沿邊士馬王威名大振三十一
年五月命都督楊文從王備邊開平閏五月太祖崩皇
太孫即位遺詔諸王臨國中毋得至京師時諸王以尊
屬擁重兵多不法帝納齊泰黃子澄謀欲因事以次削
除之憚燕王強未發乃先廢周王橚欲以牽引燕於是
告訐四起湘代齊岷皆以罪廢王內自危佯狂稱疾泰

子澄密勸帝除王帝未決建文元年夏六月燕山百戶倪諒告變逮官校於諒周鐸等伏誅下詔讓王并遣中官逮王府僚王遂稱疾篤都指揮使謝貴布政使張昺以兵守王宮都指揮張信叛附于王以情輸之王密與僧道衍謀令指揮張玉朱能潛納勇士八百人入府守衛秋七月癸酉匿壯士端禮門給貴帛入殺之遂奪九門上書天子指泰子澄為奸臣并援祖訓朝無正臣內有奸惡則親王訓兵待命天子密詔諸王統領鎮兵討

平之書既發遂舉兵自署官屬號其師曰靖難拔居庸
關破懷來執宋忠取密雲克遵化降永平二旬衆至數
萬八月天子以耿炳文為大將軍帥師致討己酉師至
真定前鋒抵雄縣壬子王夜渡白溝河圍雄拔其城屠
之甲寅都指揮潘忠楊松自鄭州來援伏兵擒之遂據
鄭州還駐白溝大將軍部校張保來降言大將軍軍三
十萬先至者十三萬半營滹沱河南半營河北王懼與
北軍戰南軍且乘之也乃縱保歸俾揚言王帥兵且至

誘其軍盡北渡河壬戌王至真定與張玉譚淵等夾擊
炳文軍大破之獲其副將李堅寯忠及都督顧成等斬
首三萬級進圍真定二日不下乃引去天子聞炳文敗
遣曹國公李景隆代領其軍九月戊辰江陰侯吳高以
遼東兵圍永平戊寅景隆合兵五十萬進營河間王語
諸將曰景隆色厲而中餒聞我在必不敢遽來不若往
援永平以致其師吳高怯不任戰我至必走然後還擊
景隆堅城在前大軍在後必成擒矣丙戌燕師援永平

壬辰吳高聞王至果走追擊敗之遂北趨大寧壬寅以計入其城居七日挾寧王權拔大寧之衆及朶顏三衛卒俱南乙卯至會州始立五軍張玉將中軍鄭亨何壽副之朱能將左軍朱榮李濬副之李彬將右軍徐理孟善副之徐忠將前軍陳文吳達副之房寬將後軍和允中毛整副之丁巳入松亭關景隆聞王征大寧果引軍圍北平築壘九門世子堅守不戰十一月庚午王次孤山邏騎還報曰白河流漸不可渡王禱於神至則水合

乃濟師景隆遣都督陳暉偵敵道左出王軍後王分軍還擊之暉衆爭渡河冰忽解溺死無算辛未與景隆戰於鄭村壩王以精騎先破其七營諸將繼至景隆大敗奔還乙亥復上書自訴請去泰子澄帝為罷二人以謝燕十二月景隆調兵德州期以明年春大舉王乃謀侵大同曰攻大同彼必赴救大同苦寒南軍脆弱且不戰疲矣庚申降廣昌二年春正月丙寅克蔚州二月癸丑至大同景隆果由紫荆關來援王已旋軍居庸景隆兵

多凍餒死者不見敵而還夏四月景隆進兵河間與郭英吳傑平安期會白溝河乙卯王營蘇家橋己未遇平安兵河側王以百騎前佯却誘安陣動乘之安敗走遂薄景隆軍戰不利暝收軍王以三騎殿夜迷失道下馬伏地視河流乃辨東西渡河去庚申復戰景隆橫陣數十里破燕後軍王自帥精騎橫擊之斬瞿能父子令邱福衝中堅不得入王盪其左景隆兵乃繞出王後大戰良久飛矢雨注王三易馬矢盡揮劍劍折走登堤佯引

鞭若招後繼者景隆疑有伏不敢前高煦救至乃解時
南軍益集燕將士皆失色王奮然曰吾不進敵不退有
戰耳乃復以勁卒突出其背夾攻之會旋風起折景隆
旗王乘風縱火奮擊斬首數萬溺死者十餘萬人郭英
潰而西景隆潰而南盡喪其所賜璽書斧鉞走德州五
月癸酉王入德州景隆走濟南庚辰攻濟南景隆大敗
南走叅政鐵鉉都督盛庸等堅守不下王堰水灌之鉉
乃佯伏地請降預懸鐵板城門上候王入擊之別設伏

斷城外橋王至板驛下王驚走伏發橋倉卒不可斷遂
得逸王憤甚築長圍晝夜攻之秋八月戊申鉉與庸乘
夜出兵掩擊王大敗解圍還北平九月盛庸代李景隆
將復取德州與吳傑平安徐凱相犄角以困北平時徐
凱方城滄州王佯出兵攻遼東至通州循河而南渡直
沽晝夜兼行冬十月戊午襲執徐凱破其城夜坑降卒
三千人遂渡河過德州盛庸遣兵來襲擊敗之十一月
壬申至臨清十二月丁酉襲破盛庸將孫霖於滑口乙

卯及庸戰於東昌庸以火器勁弩殲王兵會平安軍至
合圍數重王大敗潰圍以免亡數萬人張玉戰死三年
春正月辛酉敗吳傑平安於威縣乙丑又敗之於深州
遂還北平二月乙巳復帥師南下三月辛巳與盛庸遇
於夾河譚淵戰死朱能張武殊死鬪庸軍少却會日暮
各斂兵入營王以十餘騎逼庸營野宿及明起視已在
圍中乃從容引馬鳴角穿營而去諸將以天子有詔毋
使負殺叔父名倉卒相顧愕眙不敢發一矢是日復戰

自辰至未兩軍相勝負東北風忽起塵埃蔽天燕兵大呼乘風縱擊庸大敗走德州吳傑平安自真定引軍與庸會未至八十里聞敗引還王以計誘之傑安出兵襲王閏月戊戌過於藁城己亥與戰大風拔木傑安敗走追至真定城下癸丑至大名聞齊泰黃子澄已罷上書請召還吳傑平安盛庸兵天子使大理少卿薛嵩來報諭王釋甲王不奉詔夏五月傑安庸分兵斷燕餉道王遣指揮武勝上書詰其故天子怒下勝獄王遂遣李遠

略沛縣焚糧舟萬計秋七月己丑掠彰德丙申降林縣
平安乘虛搥北平主遣劉江迎戰安敗走房昭屯易州
西水寨攻保定王引兵圍之冬十月丁巳都指揮花英
援昭敗之峨眉山下斬首萬級昭棄寨走巳卯還北平
十一月乙巳王自為文祭南北陣亡將士當是時王稱
兵三年矣親戰陣冒矢石以身先士卒常乘勝逐北然
亦屢瀕於危所克城邑兵去旋復為朝廷守僅據有北
平保定永平三府而已無何中官被黜者來奔具言京

師空虛可取狀王乃慨然曰頻年用兵何時已乎要當臨江一決不復返顧矣十二月丙寅復出師四年春正月乙未由館陶渡河癸丑徇徐州三月壬辰平安以四萬騎躡王軍王設伏淝河大敗之丙午遣譚清斷徐州餉道還至大店為鐵鉉軍所圍王引兵馳援清突圍出合擊敗之夏四月丙寅王營小河為橋以濟平安趨爭橋陳文戰死平安軍橋南王軍橋北相持數日平安轉戰遇王於北坂王幾為安槊所及番騎王騏躍入陣掖

王逸去王曰南軍饑更一二日餉至猝未易破乃令千
餘人守橋夜半渡河而南繞出安軍後比旦安始覺適
徐輝祖來會甲戌大戰齊眉山下勝負相當明旦安拔
衆遁王引兵追及安深塹自固時燕連失大將淮土盛
暑蒸濕諸將請休軍小河東就麥觀釁王曰今敵持久
饑疲遮其餉道可以坐困奈何北渡懈將士心乃下令
欲渡河者左諸將爭趨左王怒曰任公等所之乃無敢
復言丁丑何福等營靈壁燕遮其餉道平安分兵六萬

人護之己卯王帥精銳橫擊斷其軍為二何福空壁來援王軍少却高煦伏兵起福敗走辛巳進薄其壘破之生擒平安陳暉等三十七人何福走免五月己丑下泗州謁祖陵賜父老牛酒辛卯盛庸扼淮南岸朱能邱福潛濟襲走之遂克盱眙癸巳王集諸將議所向或言宜取鳳陽或言先取淮安王曰鳳陽樓櫓完淮安多積粟攻之未易下不若乘勝直趨揚州指儀真則淮鳳自震我耀兵江上京師孤危必有內變諸將皆曰善己亥徇

揚州駐軍江北天子遣慶成郡主至軍中許割地以和不聽六月癸丑江防都督僉事陳暄以舟師叛附於王甲寅祭大江乙卯自瓜州渡盛庸以海艘迎戰敗績戊午下鎮江庚申次龍潭辛酉天子復遣大臣議割地諸王繼至皆不聽乙丑至金川門谷王穗李景隆等開門納王都城遂陷是日王分命諸將守城及皇城還駐龍江下令撫安軍民大索齊泰黃子澄方孝孺等五十餘人榜其姓名曰奸臣丙寅諸王羣臣上表勸進己巳王

謁孝陵羣臣備法駕奉寶璽迎呼萬歲王升輦詣奉天
殿即皇帝位復周王橐齊王搏爵丁丑召方孝孺草登
極詔孝孺投筆哭且罵帝大怒泰子澄亦抗辯不屈遂
與孝孺同磔于市皆夷其族坐黨死者數百人戊寅遷
興宗孝康皇帝主於陵園仍稱懿文太子秋七月壬午
朔大祀天地於南郊奉太祖配詔今年以洪武三十五
年為紀明年為永樂元年建文中更改成法一復舊制
山東北平河南被兵州縣復徭役三年未被兵者與鳳

陽淮安徐滁揚三州蠲租一年餘天下州縣悉蠲今年
田租之半癸未召前北平按察使陳瑛為左副都御史
盡復建文朝廢斥者官甲申復官制癸巳改封吳王允
燾廣澤王衡王允燧懷恩王徐王允熙敷惠王隨母妃
呂氏居懿文太子陵園癸卯命江陰侯吳高督河南陝
西兵備撫安軍民甲辰命尚書嚴震直王鉞府尹薛正
言等巡視山西山東河南陝西八月壬子命侍讀解縉
編修黃淮入直文淵閣尋命侍讀胡廣修撰楊榮編修

楊士奇檢討金幼孜胡儼同入直並預機務執兵部尚書鐵鉉至不屈殺之命左軍都督劉直鎮遼東丁巳分遣御史察天下利弊戊午命都督何福為征虜將軍鎮寧夏節制陝西行都司都督同知韓觀練兵江西節制廣東福建甲子命西平侯沐晟鎮雲南是月御史大夫景清懷利刃早朝搜得礮于市九月甲申論功封邱福祺國公朱能鄜國公張武等侯者十四人徐祥等伯者十四人甲午定功臣死罪減祿例乙未徙山西民無田

者實北平賜之鈔復五年韓觀為征南將軍鎮廣西冬
十月壬申徙封谷王穗於長沙丁巳命北平州縣棄官
避兵者朱寧等二百一十九人入粟免死成興州己未
修太祖實錄丙寅命鎮遠侯顧成鎮貴州甲戌詔從征
將士掠民間子女者還其家十一月壬辰立妃徐氏為
皇后廢廣澤王允熲懷恩王允熒為庶人俱錮鳳陽十
二月癸丑蠲被兵州縣明年夏稅

明史卷五

欽定四庫全書

明史卷六

大學士張廷玉等奉勅修

本紀第六

成祖二

永樂元年春正月己卯朔御奉天殿受朝賀宴羣臣及屬國使乙酉享太廟辛卯大祀天地於南郊復周王橚齊王榑代王桂岷王榼舊封以北平為北京癸巳命保

定侯孟善鎮遼東丁酉以宋晟為平羌將軍鎮甘肅二月庚戌設北京留守行後軍都督府行部國子監改北平曰順天府乙卯遣御史分巡天下為定制己未徙封寧王權於南昌貽書郭勒齊汗許其遣使通好癸亥耕藉田乙丑遣使徵尚師哈里瑪於烏斯藏己巳振北京六府饑辛未命法司五日一引奏罪囚壬申瘞戰地暴骨甲戌命高陽王高煦備邊開平三月庚辰命江陰侯吳高鎮大同壬午改北平行都司為大寧都司徒保定

始以大寧地畀烏梁海戊子命平江伯陳瑄都督僉事
宣信充總兵官督海運餉遼東北京歲以為常甲午振
直隸北京山東河南饑夏四月丁未朔安南胡奎乞襲
陳氏封爵遣使察實以聞己酉命戶部尚書夏原吉治
蘇松嘉湖水患辛未岷王橈縱恣不法降其官屬甲戌
命襄城伯李濬鎮江西五月丁丑除天下荒田未墾者
額稅癸未宥死罪以下遞減一等庚寅捕山東蝗丁酉
河南蝗免今年夏稅四月再論功封駙馬都尉袁容等

三人為侯陳亨子懋等六人為伯六月壬子召代王桂
不至削其護衛癸丑遣給事中御史分行天下撫安軍
民有司奸貪者逮治丁巳改上高皇帝高皇后尊謚戊
辰命武安侯鄭亨鎮宣府秋七月庚寅復貽書郭勒齊
八月己巳發流罪以下墾北京田甲戌徙直隸蘇州等
十郡浙江等九省富民實北京九月癸未命寶源局鑄
農器給山東被兵窮民庚寅初遣中官馬彬使瓜哇諸
國乙未歷城侯盛庸坐怨誹削爵尋自殺庚子削岷王

梗護衛冬十一月乙亥朔頒歷於朝鮮諸國著為令壬辰罷遣浚河民夫甲午北京地震乙未命六科辦事官言事丙申韓觀討柳州山賊平之閏月丁卯封胡奎為安南國王是年始命內臣出鎮及監京營軍朝鮮入貢者六自是歲時貢賀為常琉球中山山北山南暹羅占城爪哇西王日本刺泥安南入貢

二年春正月乙巳復命夏原吉治水蘇松乙卯大祀天地於南郊丁巳定屯田賞罰例己巳召世子高熾及高

陽王高煦還京師三月乙巳賜曾棨等進士及第出身
有差已酉始選進士為翰林院庶吉士庚戌吏部請罪
千戶違制薦士者帝曰馬周不因常何進乎果才授之
官否則罷之可耳戊辰改封敷惠王允熙甌寧王奉懿
文太子祀夏四月辛未朔置東宮官屬壬申以僧道衍
為太子少師復其姓姚賜名廣孝甲戌立子高熾為皇
太子封高煦漢王高燧趙王壬午封汪應祖為琉球國
山南王五月壬寅命豐城侯李彬鎮廣東清遠伯王友

充總兵官率舟師巡海六月丁亥汰冗官辛卯振松江
嘉興蘇州湖州饑甲午封哈密恩克特穆爾為忠順王
秋七月壬戌鄱陽民進書毀先賢杖之毀其書丙寅振
江西湖廣水災八月丁酉故安南國王陳日烿弟天平
來奔九月丙午周王橐來朝獻騶虞百官請賀帝曰瑞
應依德而至騶虞若果為祥在朕更當修省丁卯徙山
西民萬戶實北京命自今御史巡行察吏毋得撫拾人
言賢否皆具實蹟以聞冬十月丁丑河決開封乙酉蒲

城河津黃河清是月長興侯耿炳文以僭妄不道籍其
家炳文自殺十一月甲辰御奉天門錄囚癸丑京師及
濟南開封地震勅羣臣修省戊午蠲蘇松嘉湖杭水災
田租十二月壬辰同州韓城黃河清是月李景隆以居
家不道削爵錮私第籍其家是年占城巴什伯里琉球
山北山南瓜哇真臘入貢暹羅日本琉球中山入貢者
再

三年春正月乙巳韃靼索和爾內屬庚戌大祀天地於

南郊甲寅遣使責諭安南庚申復免順天永平保定田
租二年二月己巳行部尚書雖僉以言事涉怨誹誅癸
未趙王高燧居守北京三月甲寅免湖廣被水田租夏
月壬申除直隸浙江湖廣四川廣東江西福建河南戶
絕田租三萬五千餘頃六月己卯中官鄭和帥舟師使
西洋諸國庚申命中官山壽等帥兵出雲州覘敵甲申
命夏原吉等振蘇松嘉湖饑免天下農民戶口食鹽鈔
庚寅胡奎謝罪請迎陳天平歸國秋九月丁酉蠲蘇松

嘉湖水災田租凡三百三十八萬石丁巳徙山西民萬戶實北京冬十月乙丑殺駙馬都尉梅殷丁卯齊王構有罪三賜書戒之戊子頒祖訓於諸王十二月戊辰沐晟討八百降之庚辰都督僉事黃中呂毅以兵納陳天平於安南是年蘇門答刺滿刺加古里淳泥來貢封其長為王日本貢馬并俘獲倭寇為邊患者瓜哇東西占城磔里日羅夏治合貓里火州回回入貢暹羅琉球山南山北入貢者再琉球中山入貢者三

四年春正月丁未大祀天地於南郊丙辰初御午朝令
羣臣奏事得從容陳論三月辛卯朔釋奠於先師孔子
甲午設遼東開原廣寧馬市乙巳賜林環等進士及第
出身有差丙午胡奎襲殺陳天平於片站前大理卿薛
嵩死之黃中等引兵還夏四月己卯遣使購遺書五月
丁酉振常州廬州安慶饑庚戌齊王榑驕縱不法削官
屬護衛留之京師六月己未朔日當食陰雲不見禮官
請表賀不許丙寅南陽獻瑞麥諭禮部曰比郡縣屢奏

祥瑞獨此為豐年之兆命薦之宗廟秋七月辛卯命朱能為征夷將軍沐晟張輔副之帥師分道討安南兵部尚書劉儁叅贊軍務行部尚書黃福大理卿陳洽督餉詔曰安南皆朕赤子惟黎季犛父子首惡必誅他脅從者釋之罪人既得立陳氏子孫賢者毋養亂毋玩寇毋毀廬墓毋害禾稼毋攘財貨掠子女毋殺降有一如此雖功不宥乙巳申誹謗之禁閏月壬戌詔以明年五月建北京宮殿分遣大臣採木於四川湖廣江西浙江山

西八月丁酉詔通政使凡上書奏民事者雖小必以聞
癸丑齊王樽廢為庶人九月戊辰振蘇松常杭嘉湖流
民復業者十二萬餘戶冬十月戊子成國公朱能卒於
軍張輔代領其衆乙未克隘留關庚子沐晟率師會於
白鶴十一月己巳甘露降孝陵松栢醴泉出神樂觀薦
之太廟賜百官辛巳戶部人材高文雅上書言事授以
官十二月辛卯赦天下殊死以下張輔大破安南兵於
嘉林江丙申拔多邦城丁酉克其東都癸卯克西都賊

遁入海辛亥甌寧王允熙邸第火王薨是年暹羅占城
于闐淳泥日本琉球中山山南婆羅入貢瓜哇東西真
臘入貢者再巴什伯里入貢者三琉球進閩人還之回
結雅渠進玉椀却之

五年春正月丁卯大祀天地於南郊己巳張輔大敗安
南兵於木九江二月庚寅出翰林學士解縉為廣西叅
議三月丁巳封尚師哈里瑪為大寶法王辛巳張輔大
破安南兵於富良江夏四月辛卯皇長孫瞻基出閣就

學已酉振順天河間保定饑五月甲子張輔擒黎季犛
黎蒼獻京師安南平河南饑逮治匿災有司勅都察院
凡災傷不以實聞者罪之六月癸未以安南平詔天下
置交趾布政司己丑山陽民丁珏訐其鄉人誹謗擢為
刑科給事中甲午詔自永樂二年六月後犯罪去官者
悉宥之乙未張輔移師會韓觀討潯柳叛蠻癸未命張
輔訪交趾人才禮遣赴京師秋七月乙卯皇后崩丁卯
河溢河南八月乙酉命左都督何福鎮甘肅庚子錄囚

雜犯死罪減等論戍流以下釋之九月壬子鄭和俘海賊陳祖義至京師斬之乙卯御奉天門受宴南俘大賚將士冬十月潯柳蠻平十一月乙丑修永樂大典成是年琉球中山山南婆羅日本巴什伯里阿魯賽瑪爾堪蘇門答刺滿刺加小葛蘭入貢

六年春正月丁巳岷王榷復有罪罷其官屬辛酉大祀天地於南郊二月丁未除北京永樂五年以前逋賦免諸色課程三年三月癸丑令寧陽伯陳懋鎮寧夏乙卯

除河南山東山西永樂五年以前逋賦夏四月丙申始
命雲南鄉試五月壬戌夜京師地震六月庚辰詔罷北
京諸司不急之務及買辦以甦民困流民來歸者復三
年丁亥張輔沐晟班師還京秋七月癸丑論平交趾功
進封張輔英國公沐晟黔國公王友清遠侯封都督僉
事柳升安遠伯餘爵賞有差八月乙酉交趾簡定反命
沐晟為征夷將軍討之劉儁仍叅贊軍務九月己酉命
刑部疏滯獄癸亥鄭和復使西洋冬十一月丁巳錄囚

十二月丁酉沐晟及簡定戰於生厥江敗績劉儒及都督僉事呂毅叅政劉昱死之是月柳升陳瑄李彬等率舟師分道沿海捕倭是年郭勒齊為其下所弑立布尼雅錫哩為汗浣泥國王來朝衛拉特占城于闐暹羅賽瑪爾堪榜葛刺馮加施蘭日本瓜哇琉球中山山南入貢

七年春正月辛亥命戶部嚴邊關茶禁癸丑賜百官上元節假十日著為令乙卯大祀天地於南郊二月乙亥

遣使於巡狩所經郡縣存問高年八十以上賜酒肉九十加帛丙子徵致仕知府劉彥才等九十二人分署府州縣卒已以北巡告天地宗廟社稷壬午發京師皇太子監國命張輔王友率師討簡定丁亥忠誠伯茹瑄坐不謁谷王下獄死戊子謁鳳陽皇陵三月甲辰次東平州望祭泰山辛亥次景州望祭恒山乙卯帝覽奏見平安名曰平保兒尚在耶安懼自殺壬戌至北京癸亥大賚官吏軍民丙寅詔起兵時將士及北京効力人民雜

犯死罪咸宥之充軍者官復職軍民還籍伍壬申柳升
敗倭於青州海中敕還師夏四月癸酉朔皇太子攝享太
廟壬午海寇犯欽州副總兵李珪遣將擊敗之閏月戊
申命皇太子所決庶務六科月一類奏丙辰諭行在法
司重罪必五覆奏五月己卯營山陵於昌平封其山曰
天壽乙未封衛拉特瑪哈木特為順寧王太平為賢義
王巴圖博囉為安樂王六月壬寅察北巡郡縣長吏擢
汶上知縣史誠祖治行第一下易州同知張騰於獄辛

亥給事中郭驥使布尼雅錫哩為所殺丁卯斥御史洪秉等四人詔自今御史勿用吏員秋七月癸酉命淇國公邱福為征虜大將軍武成侯王聰同安侯大真副之靖安侯王忠安平侯李遠為左右叅將討布尼雅錫哩八月甲寅邱福敗績於臚朐河福及聰真忠遠皆戰死庚申張輔敗賊於鹹子關九月庚午朔日有食之張輔敗賊於太平海口甲戌贈北征死事李遠莒國公王聰漳國公遂決意親征丙子命武安侯鄭亨率師巡邊壬

午命成安侯郭亮備禦開平冬十月丁未削邱福封爵
徙其家於海南十一月戊寅張輔獲簡定於美良送京
師誅之十二月庚戌賜濟寧至良鄉民頻年遞運者田
租一年乙丑召張輔還是年滿刺加哈喇賽瑪爾堪火
州古里占城蘇門荅刺琉球中山山南入貢暹羅榜葛
刺入貢者再

八年春正月辛未召寧陽侯陳懋隨征漠北己卯皇太
子攝祀天地於南郊癸巳免去年揚州淮安鳳陽陳州

水災田租贖軍民所鬻子女乙未張輔班師仍留沐晟
等鎮之二月辛丑以北征詔天下命戶部尚書夏原吉
輔皇長孫瞻基留守北京乙巳皇太子錄囚奏賞雜犯
死罪以下從之丁未發北京癸亥遣祭所過名山大川
乙丑大閱三月丁卯命清遠侯王友督中軍安遠伯柳
升副之寧遠侯何福武安侯鄭亨督左右哨寧陽侯陳
懋廣恩伯劉才督左右掖都督劉江督前哨甲戌次鳴
鑾戌乙亥誓師夏四月庚申次威虜鎮以索馳所載水

給衛士視軍士皆食始進膳五月丁卯更名臚胸河曰
飲馬甲戌聞布尼雅錫哩西奔遂渡飲馬河追之己卯
及於鄂諾河大敗之布尼雅錫哩以七騎遁丙戌還次
飲馬河詔移師征阿魯台丁亥回回哈喇瑪雅殺都指
揮劉秉謙據肅州衛以叛千戶朱迪等討平之六月甲
辰阿魯台偽降命諸將嚴陣以待果悉衆來犯帝自將
精騎迎擊大敗之追北百餘里丁未又敗之己酉班師
秋七月丁卯次開平帝在軍念士卒艱苦每蔬食是日

宴賚始復常膳命西寧侯宋琥鎮甘肅辛巳振安慶徽
州鳳陽鎮江饑壬午至北京御奉天殿受朝賀甲午論
功行賞有差八月壬寅進封柳升安遠侯乙卯都御史
陳瑛劾寧遠侯何福怨望福懼自殺庚申河溢開封九
月巳巳幸天壽山冬十月丁酉發北京是月倭寇福州
十一月甲戌至京師十二月癸巳阿魯台遣使貢馬戊
午陳季曠乞降以為交趾右布政使季擴不受命是年
碩尼堪寇黃河東岸寧夏都指揮王倬敗沒淳泥呂宋

馮嘉施蘭蘇門荅刺榜葛刺入貢占城貢象琉球山南
瓜哇暹羅貢馬琉球中山入貢者三

九年春正月甲戌大祀天地於南郊丙子命柳升鎮寧
夏已卯命張輔為征虜副將軍會沐晟討交趾丙戌命
豐城侯李彬平江伯陳暄率浙江福建兵捕海寇二月
辛亥帝始聞陳瑛諸不法狀下獄死丙辰詔赦交趾丁
巳倭陷昌化千戶所己未工部尚書宋禮開會通河三
月甲子賜蕭時中等進士及第出身有差壬午浚祥符

縣黃河故道戊子劉江鎮遼東夏六月乙巳鄭和還自
西洋俘錫蘭山國王亞烈苦奈兒以獻釋之是月交趾
右叅議解縉坐請鑿贛江下獄秋七月丙子張輔敗賊
於月常江九月戊寅諭法司凡死罪必五覆奏壬午命
屯田軍以公事妨農務者免徵子粒著為令冬十月乙
未寬北京謫徙軍民賦役癸卯封哈密推勒特穆爾為
忠義王乙巳復修太祖實錄十一月戊午蠲陝西逋賦
癸亥張輔敗賊於生厥江丁卯立皇長孫瞻基為皇太

孫壬申命韓觀為征夷副將軍改鎮交趾都指揮葛森
鎮廣西丙子赦法司決遣罪囚毋淹滯丁丑築浙江仁
和海寧海鹽捍潮堤是月遣使督瘞戰場暴骨十二月
壬辰敕宥福餘朶顏泰寧三衛罪令入貢閏月丁巳命
府部諸臣陳軍民利弊是年浙江湖廣河南順天揚州
水河南陝西疫遣使振之滿剌加王來朝瓜哇榜葛刺
古里柯枝蘇門答刺阿魯彭亨急蘭丹南巫里暹羅入
貢阿嚕台來貢馬巴什伯里獻文豹琉球中山入貢者

三

十年春正月己丑命入覲官千五百餘人各陳民瘼不言者罪之言有不當勿問丁酉大祀天地於南郊癸丑振平陽饑逮治布政使及郡縣官不奏聞者二月辛酉蠲山西河南通賦庚辰削遼王植護衛三月丁亥命豐城侯李彬討甘肅叛寇巴爾斯多羅岱戊子賜馬鐸等進士及第出身有差甲辰免北京水災租稅夏六月甲戌諭戶部凡郡縣有司及朝使目擊民艱不言者悉逮

治秋七月癸卯禁中官干預有司政事八月癸丑張輔
大破交趾賊於神投海己未敕邊將自長安嶺迤西迄
洗馬林築石垣深濠塹冬十月戊辰獵城南武岡十一
月壬午涼州酋婁達袞叛走赤斤蒙古命右庶子楊榮
詣甘肅經畧之丙申鄭和復使西洋十二月錦衣衛指
揮紀綱誣奏浙江按察使周新殺之是年淳泥占城暹
羅滿剌加榜葛刺蘇門答剌南淳利琉球山南八貢
十一年春正月辛巳朔日有食之詔罷朝賀宴會壬午

諭通政使禮科給事中凡朝覲官境內災傷不以聞為
他人所奏者罪之辛卯大祀天地於南郊辛丑以豐城
侯李彬鎮甘肅召宋琥還二月辛亥始設貴州布政司
癸亥令北京民戶分養孳生馬著為令甲子幸北京皇
太孫從尚書蹇義學士黃淮諭德楊奇士洗馬楊溥輔
皇太子監國乙丑發京師命給事中御史所過存問高
年賜酒肉及帛丙寅葬仁孝皇后於長陵辛未次鳳陽
謁皇陵夏四月己酉至北京五月丁亥定死罪情輕者

納鈔贖罪例壬辰赤斤蒙古擒婁達袞來獻丁未曹縣
獻騶虞禮官請賀不許秋七月戊寅封阿魯台為和寧
王八月甲子北京地震乙丑命鎮遠侯顧成討思州靖
州叛苗九月壬午詔自今郡縣官每歲春行視境內蝗
蝻害稼即捕絕之不如詔者二司并罪冬十月丙寅以
璽書命皇太子錄囚十一月戊寅以野蠶繭為衾命皇
太子薦太廟壬午衛拉特瑪哈木特兵渡飲馬河阿魯
台告警命邊將嚴守備甲申命寧陽侯陳懋都督譚青

馬聚朱崇巡寧夏大同山西邊簡練士馬尋命陝西山
西及潼關等五衛兵駐宣府中都遼東河南三都指揮
使司及武平等四衛兵會北京乙巳命應城伯孫巖備開
平十二月壬子張輔沐晟大敗交趾賊於愛子江是年
嗎哈木特弒其主布尼雅錫哩立塔爾巴為汗巴什伯
里滿刺加占城爪哇西王入貢琉球中山入貢者四琉
球山南入貢者再

明史卷六

欽定四庫全書

明史卷七

大學士張廷玉等奉勅修

本紀第七

成祖三

十二年春正月庚寅思州苗平辛丑發山東山西河南
及鳳陽淮安徐邳氏十五萬運糧赴宣府二月己酉大
閱庚戌親征衛拉特命安遠侯柳升領大營武安侯鄭

亨頌中軍寧陽侯陳懋豐城侯李彬頌左右哨成山侯
王通都督譚青頌左右掖都督劉江朱榮為前鋒庚申
振鳳翔隴州饑按長吏不言者罪三月癸未張輔俘陳
季擴於老撾以獻交趾平庚寅發北京皇太孫從夏四
月甲辰朔次興和大閱己酉頌軍中賞罰號令庚戌設
傳令紀功官丁卯次屯雲谷博羅布哈等來降五月丁
丑命尚書光祿卿給事中為督陣官察將士用命不用
命者六月甲辰劉江遇衛拉特兵戰於剛哈拉海敗之

戊申次和拉和錫衮瑪哈木特帥衆來犯帝升高見寇
分三隊命柳升等分隊夾攻火器齊發帝率鐵騎馳擊
大敗之殺王子十餘人追至圖拉河瑪哈木特宵遁庚
戌班師宣捷於阿魯台戊午次三峰山阿魯台遣使來
朝己巳以敗衄拉特詔天下秋七月戊子次紅橋詔六
師入關有踐田禾取民蓄產者以軍法論己亥次沙河
皇太子遣使來迎八月辛丑朔至北京御奉天殿受朝
賀丙午蠲北京州縣租二年戊午賞從征將士九月癸

未郭亮徐亨備開平丙戌靖州苗平甲午賈獻鎮甘肅
劉江鎮遼東是月晉王濟熈以讒廢為庶人進封平陽
王濟熈為晉王閏月甲辰以太子遣使迎駕緩徵侍讀
黃淮侍講楊士奇正字金問及洗馬楊溥芮善下獄未
幾釋士奇復職甲子召吳高還丁卯命都督朱榮鎮大
同冬十一月甲辰錄囚庚申蠲蘇松杭嘉湖水災田租
四十七萬九千餘石是年尼博囉國沙的新葛來朝封
為王彭亨烏斯藏入貢真臘進金縷衣琉球中山王貢

馬榜葛刺貢麒麟

十三年春正月丙午塞居庸以北隘口丁未瑪哈木特
謝罪請朝貢許之壬子北京午門災戊午敕內外諸司
蠲諸宿逋將士軍官犯罪者悉宥之二月癸酉遣指揮
劉斌給事張磬等十二人巡視山西山東大同陝西甘
肅遼東軍操練屯政覈實以聞甲戌命行在禮部會試
天下貢士癸未張輔等師還戊子論平交趾功賞賚有
差乙未釋工作囚徒三月己亥策士於北京賜陳循等

進士及第出身有差丙午廣西蠻叛指揮同知葛森討
平之夏四月戊辰命張輔鎮交趾甲申兵部尚書兼詹
事金忠卒五月丁酉朔日有食之乙丑鑿清江浦通北
京漕道六月振北京河南山東水災秋七月癸卯鄭和
還乙巳四川戎縣山都掌蠻平八月庚辰振山東河南
北京順天州縣饑九月壬戌北京地震冬十月甲申獵
於近郊壬辰法司奏侵冒官糧者帝怒命戮之及覆奏
帝曰朕過矣仍論如律自今死罪者皆五覆奏著為令

十二月蠲順天蘇州鳳陽浙江湖廣河南山東州縣水旱田禾是年疏球山南山北瓜哇西王占城古里柯枝南渤海甘巴里滿刺加忽魯謨斯哈密哈喇賽馬爾堪火州吐魯番蘇門荅刺俺都淮錫喇斯入貢麻林及諸番進麒麟天馬神鹿琉球中山入貢者再

十四年春正月己酉北京河南山東饑免永樂十二年通租發粟一百三十七萬石有奇振之辛酉都督金玉討山西廣靈山寇平之三月癸巳命都督梁福鎮湖廣

貴州壬寅阿魯台敗衛拉特來獻捷壬申禮部尚書呂震請封禪帝曰今天下雖無事四方多水災疾疫安敢自謂太平且六經無封禪之文事不師古甚無謂也不聽夏四月乙亥以胡廣為文淵閣大學士六月丁卯會都督同知蔡福等備倭山東秋七月丁酉遣使捕北京河南山東州縣蝗壬寅河決開封乙巳錦衣衛指揮使紀綱謀不軌伏誅八月癸酉旦壽星見禮臣請上表賀不許丁亥作北京西宮九月癸卯京師地震戊申發北

京冬十月丁丑次鳳陽祀皇陵癸未至自北京謁孝陵
十一月壬寅詔文武羣臣集議營建北京丙午詔張輔
還戍申漢王高煦以縱軍士刼掠削二護衛徙山東山
西湖廣流民於保安州賜復三年十二月丁卯鄭和復
使西洋是年占城古里瓜哇滿刺加蘇門答刺南巫里
淳泥彭亨錫蘭山溜山南渤利阿丹麻林忽魯謨斯柯
枝入貢琉球中山入貢者再

十五年春正月丁酉大祀天地於南郊壬子平江伯陳

瑄督漕運未赴北京二月癸亥谷王穗謀逆廢為庶人
丁卯命豐城侯李彬鎮交趾壬申命泰寧侯陳珪董建
北京柳升王通副之三月丁亥交趾始貢士至京師丙
申詔雜犯死罪以下囚輸作北京贖罪丙午漢王高煦
謀逆事覺帝欲免為庶人以皇太子救解徙封樂安州
壬子北巡發京師皇太子監國夏四月己巳次邾城申
禁軍士毋踐民田稼有傷者除今年租或先被水旱逋
租亦除之癸未西宮成五月丙戌至北京六月丁酉李

彬討交趾賊黎核斬之己亥中官張謙使西洋還敗倭寇於金鄉衛秋七月乙亥賜皇太子務本之訓諭曰此書備修齊治平之道能沉潛玩味大有益矣八月甲午甌寧人進金丹帝曰此妖人也令自餌之毀其方書九月丁卯曲阜孔子廟成帝親製文勒石冬十月李彬敗交趾賊楊進江斬之十一月癸酉命禮部尚書趙鼎為兵部尚書巡視塞北屯戍軍民利弊是年西洋蘇祿東西峒王來朝琉球中山巴什伯里琉球山南真臘淳泥

占城暹羅哈喇賽瑪爾堪入貢

十六年春正月甲寅交趾黎利反都督朱廣擊敗之甲戌倭陷松門衛按察司僉事石魯坐誅命興安伯徐亨都督夏貴備開平二月辛丑交趾四忙縣賊殺知縣毆陽智以叛李彬遣將擊走之三月甲寅賜李騏等進士及第出身有差命都督僉事劉鑑備邊大同戊寅姚廣孝死夏五月庚戌重修太祖實錄成丁巳胡廣卒秋七月己巳敕責陝西諸司比聞所屬歲屢不登致民流莩

有司坐視不恤又不以聞其咎安在其速發倉儲振之
贊善梁潛司諫周冕以輔導皇太子有闕皆下獄死冬
十二月戊子諭法司朕屢敕中外官潔已愛民而不肖
官吏恣肆自若百姓苦之夫良農必去稂莠者為害苗
也繼今犯賊必論如法辛丑命成山侯王通馳傳振陝
西饑是年暹羅占城瓜哇蘇門答刺尼博囉滿刺加南
渤利哈喇沙哈爾千里達賽瑪爾堪八貢琉球中山入
貢者再

十七年春二月乙酉命興安伯徐亨備興和開平大同
夏五月丙午都督方政敗黎利於可藍柵六月壬午免
順天府去年水災田租戊子劉江殲倭寇於望海埭封
江廣寧伯秋七月庚申鄭和還八月中官馬騏驎交趾
又安土知府潘僚反九月丙辰慶雲見禮臣請表賀不
許冬十二月庚辰諭法司曰刑者聖人所慎匹夫匹婦
不得其死足傷天地之和召水旱之災甚非朕寬恤之
意自今在外諸司死罪咸送京師審錄三覆奏然後行

刑乙未命工部侍郎劉仲廉覈實交趾戶口田賦察軍
民利病是年哈密吐魯番錫喇斯伊思帕罕真臘占城
哈喇阿魯南渤利蘇門答剌拔達克山滿剌加入貢琉
球中山入貢者四

十八年春正月癸卯李彬及都指揮孫霖徐源敗黎利
於嘉江閏月丙子以翰林院學士楊榮金幼孜為文淵
閣大學士庚辰擢人材布衣馬麟等十三人為布政使
叅政叅議二月己酉蒲臺妖婦唐賽兒作亂命安遠侯

柳升帥師討之三月辛巳敗賊於郅石柵寨都指揮劉忠戰沒賽兒逸去甲申山東都指揮僉事衛青敗賊於安邱指揮王真敗賊於諸城獻俘京師戊子山東布政使儲埏張海按察使劉本等坐縱盜誅戊戌以逗遛徵柳升下吏尋釋之夏五月壬午命左都督朱榮鎮遼東庚寅交趾叅政侯保馮貴禦賊戰死六月丙午北京地震秋七月丁亥命徐亨備開平八月丁酉朔日有食之九月己巳召皇太子丁亥詔自明年改京師為南京北

京為京師冬十月庚申李彬遣指揮使方政敗黎利於老撾十一月戊辰以遷都北京詔天下是月振青萊饑十二月己未皇太子及皇太孫至北京癸亥北京郊廟宮殿成是年始設東廠命中官刺事古麻剌朗王來朝暹羅占城瓜哇滿剌加蘇門答剌蘇祿西王入貢

十九年春正月甲子朔奉安五廟神主於太廟御奉天殿受朝賀大宴甲戌大祀天地於南郊戊寅大赦天下癸巳鄭和復使西洋二月辛丑命都督僉事胡原帥師

巡海捕倭三月辛巳賜曾鶴齡等進士及第出身有差
夏四月庚子奉天華蓋謹身三殿災詔羣臣直陳闕失
以言遷都不便殺主事蕭儀乙巳詔罷不便於民及不
急諸務蠲十七年以前逋賦免去年被災田糧己酉萬
壽節以三殿災止賀癸丑蹇義等二十六人巡行天下
安撫軍民五月乙丑出建言給事中柯暹御史何忠鄭
維桓羅通等為知州庚寅令交趾屯田秋七月己巳帝
將北征敕都督朱榮顧前鋒安遠侯柳升顧中軍寧陽

侯陳懋領御前精騎永順伯薛斌恭順伯吳克忠領馬
隊武安侯鄭亨陽武侯薛祿領左右哨英國公張輔成
山侯王通領左右掖八月辛卯朔日有食之冬十一月
辛酉分遣中官楊實御史戴誠等覈天下庫藏出納之
數丙子議北征軍餉下戶部尚書夏原吉刑部尚書吳
中於獄兵部尚書方賓自殺辛巳侍讀李時勉以條上
時務十五事忤帝意下獄甲申發直隸山西河南山東
及南畿應天等五府祿和徐三州丁壯運糧期明年二

月至宣府是年衛拉特賢義王太平安樂王巴圖博囉
來朝忽魯謨斯阿丹祖法兒刺撒不刺哇木骨都東古
里柯枝加異勒錫蘭山溜山南渤利蘇門答刺阿魯滿
刺加甘巴里蘇祿榜葛刺淳泥古麻刺朗王入貢暹羅
入貢者再

二十年春正月己未朔日有食之罷朝會詔羣臣修省
辛未大祀天地於南郊壬申豐城侯李彬卒於交趾二
月乙巳命隆平侯張信兵部尚書李慶分督北征軍餉

役民夫二十三萬五千有奇運糧三十七萬石三月丙寅詔有司遇災先振後聞乙亥阿魯台犯興和都指揮王喚戰死丁丑親征阿魯台皇太子監國戊寅發京師辛巳次鷄鳴山阿魯台遁夏四月乙卯次雲州大閱五月乙丑獵於偏嶺丁卯大閱辛未次西涼亭壬申大閱乙酉次開平六月壬辰令軍行出應昌結方陣以進癸巳謀報阿魯台兵攻萬全諸將請分兵還擊帝曰詐也彼慮大軍搗其巢穴欲以牽制我師敢攻城哉甲午次

陽和谷寇攻萬全者果遁去秋七月己未阿魯台棄輜重於庫倫海側北遁發兵焚之收其牲畜遂旋師謂諸將曰阿魯台敢悖逆恃烏梁海為羽翼也當還師翦之簡步騎二萬分五道並進庚午過於奇拉爾河帝親擊敗之追奔三十里斬部長數十人辛未徇河西捕斬甚衆甲戌烏梁海餘黨詣軍門降是月皇太子免南北直隸山東河南郡縣水災糧芻共六十一萬有奇八月戊戌諸將分道者俱獻捷辛丑以班師詔天下壬寅命鄭

亨薛祿守開平鄭和還九月壬戌至京師癸亥左春坊
大學士楊士奇坐輔導有闕下獄丙寅復下吏部尚書
蹇義禮部尚書呂震於獄尋俱釋之辛未錄從征功封
左都督朱榮武進伯都督僉事薛貴安順伯冬十月癸
巳分遣中官及朝臣八十人覈天下倉糧出納之數十
二月辛卯命朱榮鎮遼東閏月戊寅乾清宮災是年還
羅蘇門答刺阿丹等國遣使隨貢方物占城琉球中山
布哈爾哈密衛拉特吐魯番瓜哇入貢

二十一年春正月乙未大祀天地於南郊癸卯交趾叅將榮昌伯陳智追敗黎利於車來二月己巳都指揮使鹿榮討柳州叛蠻平之三月庚子御史王愈等會決重囚誤殺無罪四人坐棄市夏五月癸未免開封南陽衛輝鳳陽等府去年水災田租己丑常山護衛指揮孟賢等謀逆伏誅六月庚戌朔日有食之秋七月戊戌復親征阿魯台命安遠侯柳升遂安伯陳英領中軍武安侯鄭亨保定侯孟瑛領左哨陽武侯薛祿新寧伯譚忠碩

右哨英國公張輔安平侯李安頌左掖成山侯王通興安侯徐亨領右掖寧陽侯陳懋領前鋒庚子釋李時勉復其官辛丑皇太子監國壬寅發京師戊申次宣府敕居庸關守將止諸司進奉八月己酉大閱庚申塞黑峪長安嶺諸邊險要丁丑皇太子免兩京山東郡縣水災田租九月戊子次西陽河癸巳聞阿魯台為衛拉特所敗部落潰散遂駐師不進冬十月甲寅次上莊堡迤北王子額森托干帥所部來降封忠勇王賜姓名金忠庚午

卷七
班師十一月甲申至京師是年錫蘭山王來朝又遣使
入貢占城古里忽魯謨斯阿丹祖法兒刺撒不刺哇木
骨都朶柯枝加異勒溜山南渤利蘇門答刺阿魯滿刺
加錫拉斯榜葛刺琉球中山入貢

二十二年春正月甲申阿魯台犯大同開平詔羣臣議
北征敕邊將整兵俟命丙戌徵山西山東河南陝西遼
東五都司及西寧鞏昌洮岷各衛兵期三月會北京及
宣府戊子大祀天地於南郊癸巳鄭和復使西洋三月

戊寅大閱諭諸將親征命柳升陳英領中軍張輔朱勇
領左掖王通徐亨領右掖鄭亨孟瑛領左哨薛祿譚忠
領右哨陳懋金忠領前鋒己卯賜邢寬等進士及第出
身有差夏四月戊申命皇太子監國己酉發京師庚午
次隰寧謀報阿魯台走達蘭納穆爾河遂趨進師五月
己卯次開平使使招諭阿魯台諸部乙酉瘞道中遺骸
丁酉宴羣臣於應昌命中官歌太祖御製詞五章曰此
先帝所以戒後嗣也雖在軍旅何敢忘己亥次威遠州

復宴羣臣自製詞五章命中官歌之皇太子令免廣平
順德揚州及湖廣河南郡縣水災田租六月庚申前鋒
至達蘭納穆爾河不見敵命張輔等窮搜山谷三百里
無所得進駐河上癸亥陳懋等引兵抵白邨山以糧盡
還甲子班師命鄭亨等以步卒西會於開平壬申夜南
京地震秋七月庚辰勒石於清水源之崖戊子遣呂震
以旋師諭太子詔告天下己丑次蒼崖戍不豫顧左右
歎曰夏原吉愛我庚寅至榆木川大漸遺詔傳位皇太

子喪禮一如高皇帝遺制辛卯崩年六十有五太監馬雲密與大學士楊榮金幼孜謀以六軍在外祕不發喪鎔錫為柩以斂載以龍輦所至朝夕上膳如常儀壬辰楊榮偕御馬監少監海壽馳訃皇太子壬寅次武平鎮鄭亨步軍來會八月甲辰楊榮等至京師皇太子即日遣太孫奉迎於開平己酉次鵬鶚谷皇太孫至軍中發喪壬子及郊皇太子迎入仁智殿加殮納梓宮九月壬午上尊謚曰體天弘道高明廣運聖武神功純仁至孝

文皇帝廟號太宗葬長陵嘉靖十七年九月改上尊號
曰啟天弘道高明肇運聖武神功純仁至孝文皇帝廟
號成祖

贊曰文皇少長習兵據幽燕形勢之地乘建文孱弱長
驅內向奄有四海即位以後躬行節儉水旱朝告夕振
無有壅蔽知人善任表裏洞達雄武之畧同符高祖六
師屢出漠北塵清至其季年威德遐被四方賓服受朝
命而入貢者殆三十國幅隕之廣遠邁漢唐成功駿烈

卓乎盛矣然而革除之際倒行逆施慙德亦曷可掩哉

明史卷七

欽定四庫全書

明史卷八

大學士張廷玉等奉 勅修

本紀第八

仁宗

仁宗敬天體道純誠至德弘文欽武章聖達孝昭皇帝
諱高熾成祖長子也母仁孝文皇后夢冠冕執圭者上
謁寤而生帝幼端重沉靜言動有經稍長習射發無不

中好學問從儒臣講論不輟洪武二十八年冊為燕世子嘗命與秦晉周三世子分閱皇城四門衛士還奏獨後問之對曰旦寒甚俟衛士朝食而後閱故後又命分閱章奏獨取切軍民利病及闕宗社大計者白之或文字謬誤不以聞太祖指示之曰兒忽之耶對曰不敢忽顧小過不足瀆天聽又嘗問堯湯時水旱百姓奚恃對曰恃聖人有恤民之政太祖喜曰孫有君人之識矣成祖舉兵世子守北平善拊士卒以萬人拒李景隆五十

萬衆城賴以全先是高煦高燧俱以慧黠有寵於成祖而高煦從軍有功官寺黃巖等復黨高燧陰謀奪嫡譖世子會朝廷用方孝孺策賜世子書為離間世子不啟緘上之而儼先潛報成祖曰世子與朝廷通使者至矣無何世子所遣使亦至成祖發書視之乃歎曰吾父子至愛尚見讒間况君臣乎成祖踐阼以北平為北京仍命居守永樂二年二月始召至京立為皇太子成祖數北征命之監國裁決庶政四方水旱饑饉輒遣振恤仁

聞大著而高煦高燧與其黨日伺隙讒構或問太子亦知有讒人乎曰不知也吾知盡子職而已十年北征還以太子遣使後期且書奏失辭悉徵宮僚黃淮等下獄十五年高煦以罪徙安樂明年黃儼等復譖太子擅赦罪人宮僚多坐死者侍郎胡濙奉命察之密疏太子誠敬孝謹七事以聞成祖意乃釋其後黃儼等謀立高燧事覺伏誅高燧以太子力解得免自是太子始安二十二年七月辛卯成祖崩於榆木川八月甲辰遺詔至遣

皇太孫迎喪開平丁未出夏原吉等於獄丁巳即皇帝
位大赦天下以明年為洪熙元年罷西洋寶船巡西市
馬及雲南交趾採辦戊午復夏原吉吳中楊勉官已未
命武安侯鄭亨鎮大同保定侯孟瑛鎮交趾襄城伯李
隆鎮山海武進伯朱榮鎮遼東復設三公三孤官以公
侯伯尚書兼之進楊榮太常寺卿金幼孜戶部侍郎兼
大學士如故楊士奇為禮部左侍郎兼華蓋殿大學士
黃淮通政使兼武英殿大學士俱掌內制楊溥為翰林

學士辛酉命鎮遠侯顧興祖充總兵官討廣西叛蠻甲子汰冗官乙丑召漢王高煦赴京戊辰官吏謫隸軍籍者放還鄉已巳詔文臣年七十致仕九月癸酉定用鈔中鹽則例交趾都指揮方政與黎利戰於茶籠州敗績指揮同知伍雲力戰死丙子召尚書黃福於交趾以兵部尚書陳洽代之庚辰河溢開封免稅糧遣右都御史王彰撫恤之壬午敕自今官司所用物料於所產地計直市之科派病民者罪不宥癸未禮部尚書呂震請除

服不許乙酉增諸王歲祿鎮守交趾中官山壽請受交
趾頭目黎利為清化知府齎勅往諭從之丙戌以風憲
官備外任命給事中李謙等三人為僉事蕭奇等三十
五人為州縣官丁亥黎利寇清化指揮同知陳忠戰死
戊子始設南京守備以襄城伯李隆為之乙未散畿內
民所養官馬於諸衛所戊戌賜吏部尚書蹇義及楊士
奇楊榮金幼孜銀章各一曰絕愆糾謬諭以協心贊務
凡有關失當言者用印密封以聞冬十月壬寅罷市民

間金銀革兩京戶部行用庫癸卯詔天下都司衛所修治城池戊申通政司請以四方雨澤章奏送給事中收貯帝曰祖宗令天下奏雨澤欲知水旱以施恤民之政積之通政司既失之矣今又令收貯是欲上之人終不知也自今奏至即以聞己酉冊妃張氏為皇后壬子立長子瞻基為皇太子封子瞻埈為鄭王瞻墉越王瞻埈襄王瞻垺荆王瞻墀淮王瞻埈滕王瞻埈梁王瞻埈衛王乙卯詔中外官舉賢才嚴舉主連坐法丁巳令三法

司會大學士府部通政六科於承天門錄囚著為令戊午以安遠王貴燮巴東王貴煊不奔父喪免為庶人庚申增京官及軍士月廩壬戌封保母楊氏為衛聖夫人丁卯擢監生徐永潛等二十人為給事中十一月壬申朔詔禮部建文諸臣家屬在教坊司錦衣衛浣衣局及習匠功臣家為奴者悉宥為民還其田土言事謫戍者亦如之癸酉詔有司條政令之不便民者以聞凡被災不即請振者罪之阿魯台來貢馬甲戌詔羣臣言時政

關失乙亥赦烏梁海罪始命近畿諸衛官軍更番詣京
師操練丙子遣御史巡按邊衛癸未遣御史分巡天下
考察官吏丙戌賜戶部尚書夏原吉絕愆糾繆銀章已
丑禮部奏冬至節請受賀不許庚寅敕諸將嚴備邊辛
卯禁所司擅役屯田軍士壬辰以都督方政同榮昌伯
陳智鎮交趾是月諭蹇義楊士奇夏原吉楊榮金幼孜
曰前世人主或自尊大惡聞直言臣下相與阿附以至
於敗朕與卿等當用為戒又諭士奇曰頃羣臣頗懷忠

愛朕有過方自悔而進言者已至良愜朕心十二月癸卯宥建文諸臣外戚全家戍邊者留一人餘悉放還辛丑揭天下三司官姓名於奉天門西序癸丑免被災稅糧庚申葬文皇帝於長陵丙寅鎮遠侯顧興祖破平樂潯州蠻是年于闐琉球占城哈密古麻剌朗滿剌加蘇祿衛拉特入貢

洪熙元年春正月壬申朔御奉天門受朝不舉樂乙亥敕內外羣臣修舉職業己卯享太廟建弘文閣命儒臣

入直楊溥掌閣事癸未以時雪不降敕羣臣修省丙戌
大祀天地於南郊奉太祖太宗配壬辰朝臣予告歸省
者賜鈔有差著為令己亥遣布政使周幹按察使胡槩
叅政葉春巡視南畿浙江二月辛丑頒將軍印於諸邊
將戊申祭社授命太監鄭和守備南京丙辰耕藉田丙
寅太宗神主祔太廟是月南京地震三月壬申前光
祿署丞權謹以孝行擢文華殿大學士丁丑求直言戊
子隆平饑戶部請以官麥貸之帝曰即振之何貸為已

丑詔曰刑者所以禁暴止邪導民於善非務誅殺也吏或深文傅會以致冤濫朕深憫之自今朕或過於嫉惡律外用籍沒及凌遲之刑者法司執奏五奏不允同三公大臣執奏必允乃已諸司不得鞭囚背及加人宮刑有自宮者以不孝論非謀反勿連坐親屬古之盛世採聽民言用資戒儆今奸人往往撫拾誣為誹謗法吏刻深鍛鍊成獄刑之不中民則無措其除誹謗禁有告者一切勿治庚寅以陽武侯薛祿為鎮朔大將軍率師巡

開平大同邊卒卯命泰將安平伯李安與榮昌伯陳智
同鎮交趾戊戌將還都南京詔北京諸司悉稱行在復
北京行部及行後軍都督府是月南京地屢震夏四月
壬寅帝聞山東及淮徐民乏食有司徵夏稅方急乃御
西角門詔大學士楊士奇草詔免今年夏稅及秋糧之
半士奇言上恩至矣但須戶工二部與聞帝曰救民之
窮當如救焚拯溺不可遲疑有司慮國用不足必持不
決之意趣命中官具楮筆令士奇就門樓書詔帝覽畢

即用璽付外行之顧士奇曰今可語部臣矣進大理少卿弋謙為副都御史命治中官之採木四川貪橫厲民者設北京行都察院壬子命皇太子謁孝陵遂居守南京戊午如天壽山謁長陵己未還宮是月振河南及大名饑南京地震五月己卯侍讀李時勉侍講羅汝敬以言事改御史尋下獄庚辰帝不豫遣使召皇太子於南京辛巳大漸遣詔傳位皇太子是日崩於欽安殿年四十有八七月己巳上尊謚廟號仁宗葬獻陵

贊曰當靖難師起仁宗以世子居守全城濟師其後成
祖乘輿歲出北征東宮監國朝無廢事然中遘媒孽瀕
於危疑者屢矣而終以誠敬獲全善乎其告人曰吾知
盡子職而已不知有讒人也是可為萬世子臣之法矣
在位一載用人行政善不勝書使天假之年涵濡休養
德化之盛豈不與文景比隆哉

明史卷八

欽定四庫全書

史部

明史卷

九至
十三

內閣中書_臣瞿照覆勘

總校官編修_臣朱鈴

欽定四庫全書

明史卷九

大學士張廷玉等奉 勅修

本紀第九

宣宗

宣宗憲天崇道英明神聖欽文昭武寬仁純孝章皇帝
諱瞻基仁宗長子也母誠孝昭皇后生之前夕成祖夢
太祖授以大圭曰傳之子孫永世其昌既彌月成祖見

之曰兒英氣溢面符吾夢矣比長嗜書智識傑出永樂
七年從幸北京令觀農具及田家衣食作務本訓授之
八年成祖征沙漠命留守北京九年十一月立為皇太
孫始冠自是巡幸征討皆從嘗命學士胡廣等即軍中
為太孫講論經史每語仁宗曰此他日太平天子也仁
宗即位立為皇太子夏四月以南京地屢震命往居守
五月庚辰仁宗不豫璽書召還六月辛丑還至良鄉受
遺詔入宮發喪庚戌即皇帝位大赦天下以明年為宣

德元年辛亥諭邊將嚴守備甲寅趣中官在外採辦者
還罷所市物秋七月乙亥尊皇后為皇太后立妃胡氏
為皇后辛卯鎮遠侯顧興祖討大藤峽蠻平之乙未諭
法司慎刑獄閏月戊申命安順伯薛貴清平伯吳誠都
督馬英都指揮梁成帥師巡邊乙丑楊溥入直文淵閣
八月戊辰都指揮李英討安定庫森叛番大敗之安定
王桑爾節沙克宜詣闕謝罪壬申詔內外羣臣舉廉潔
公正堪牧民者癸未命大理卿胡槩叅政葉春巡撫南

畿浙江設巡撫自此始九月壬寅葬昭皇帝於獻陵乙卯定科舉取士額冬十月戊寅南京地震戊子敕公侯伯五府六部大學士給事中審復重囚十一月戊戌顧興祖討平思恩蠻辛酉命陽武侯薛祿為鎮朔大將軍巡邊十二月甲申顧興祖討平宜山蠻是年哈密回回滿拉薩鼎占城琉球中山瓜哇烏斯藏衛拉特淳泥入貢

宣德元年春正月癸卯享太廟丁未大祀天地於南郊

癸丑赦死罪以下運糧宣府自贖己未遣侍郎黃宗載等十五人清理天下軍伍後遣使著為令二月戊辰祭社稷丁丑耕藉田丙戌謁長陵獻陵丁亥還宮三月己亥榮昌伯陳智都督方政討黎利敗績於茶籠州又安知府琴彭死之癸丑以行在禮部侍郎張瑛兼華蓋殿大學士直文淵閣夏四月乙丑命成山侯王通為征夷將軍充總兵官討黎利尚書陳洽叅贊軍務陳智方政奪官從軍立功五月甲午朔錄囚丙申詔赦交趾許黎

利自新丙午敕郡縣瘞遺骸庚申詔薛祿還秋七月癸巳京師地震乙未免山東夏稅巳亥諭六科凡中官傳旨必覆奏始行壬子罷湖廣採木八月壬戌漢王高煦反丙寅宥武臣殊死以下罪復其官巳巳親征高煦命鄭王瞻埈襄王瞻塏居守陽武侯薛祿清平伯吳誠將前鋒大賚五軍將士辛未發京師辛巳至樂安帝兩遣書諭降又以敕繫矢射城中諭禍福壬午高煦出降癸未改樂安曰武定州乙酉班師九月丙申至自武定州

銅高煦於西內戊戌法司鞠高煦同謀者詞連晉王濟
燾趙王高燧詔勿問冬十月戊寅釋李時勉復為侍讀
十一月乙未成山侯王通擊黎利於應平敗績尚書陳
洽死之十二月辛酉免六師所過秋糧辛未錄囚宥免
三十餘人乙酉命征南將軍總兵官黔國公沐晟帥興
安伯徐亨新寧伯譚忠征虜副將軍安遠侯柳升帥保
定伯梁銘都督崔聚由雲南廣西分道討黎利兵部尚
書李慶泰贊軍務命工部尚書黃福鎮交趾掌布政按

察司事是月瓜哇暹羅琉球蘇門答刺滿刺加白葛達
賽瑪爾堪吐魯番哈密烏斯藏入貢

二年春正月庚子大祀天地於南郊丁未有司奏歲問
囚數帝謂百姓輕犯法由於教化未行命申教化二月
癸亥以行在戶部侍郎陳山為本部尚書兼謹身殿大
學士乙亥黎利攻交趾城王通擊敗之三月辛卯賜馬
愉等進士及第出身有差夏四月庚申黎利陷昌江都
指揮李任指揮顧福劉順知府劉子輔中官馮智死之

甲子晉王濟燬呪詛謀逆事覺廢為庶人已巳王通許
黎利和五月癸巳命薛祿督餉開平己亥仁宗神主祔
太廟丙午錄囚六月戊寅錄囚秋七月己亥黎利陷隘
留闕鎮遠侯顧興祖擁兵不救逮治之庚子錄囚辛丑
命都督同知陳懷充總兵官帥師討松潘蠻丁未薛祿
敗敵於開平己酉命都督僉事山雲為征蠻將軍鎮廣
西八月甲子黃淮致仕免兩京山西河南州縣被災稅
糧九月壬辰錄囚乙未柳升師次倒馬坡遇伏戰死是

日保定伯梁銘病卒丙申尚書李慶病卒師大潰泰將
崔聚郎中史安主事陳鏞李宗昉死之冬十月戊寅王
通棄交趾與黎利盟十一月乙酉赦黎利遣侍郎李琦
羅汝敬立陳暲為安南國王悉召文武吏士還己亥以
皇長子生大赦天下免明年稅糧三之一十二月丁丑
振陝西饑并給絹布十五萬足是年瓜哇占城暹羅琉
球衛拉特哈密伊蘭巴里賽瑪爾堪入貢

三年春正月甲午大祀天地於南郊丙申陳懷平松潘

蠻二月戊午立皇長子祁鎮為皇太子是月作帝訓成
三月癸未廢皇后胡氏立貴妃孫氏為皇后壬辰錄囚
夏四月癸亥敕凡官民建言章疏尚書都御史給事中
會議以聞勿諱閏月壬午朔以平松潘蠻功進都督同
知陳懷等爵有差壬寅錄囚免山西旱災稅糧甲辰命
有司振卹庚戌論棄交趾罪王通等及布政使弋謙中
官山壽馬騏下獄論死籍其家鎮遠侯顧興祖并下獄
五月壬子李琦羅汝敬還黎利表陳罵卒子孫并絕乞

守國侯命辛酉錄囚己巳復遣羅汝敬等諭黎利立陳氏後辛未贈交趾死事諸臣壬申免北京被災夏稅六月丙戌免陝西被災夏稅丁未命都御史劉觀巡視河道秋七月戊辰錄囚八月辛卯罷北京行部及行後軍都督府丁未帝自將巡邊九月辛亥次石門驛烏梁海寇會州帝帥精卒三千人往擊之乙卯出喜峯口擊寇於寬河帝親射其前鋒殪三人兩翼軍並發大破之寇望見黃龍旗下馬羅拜請降皆生縛之斬渠酋甲子班

師癸酉至自喜峯口冬十一月癸酉錦衣指揮鍾法保
請採珠東莞帝曰是欲擾民以求利也下之獄十二月
庚子廣西總兵官山雲討擒忻城蠻是年占城暹羅瓜
哇琉球衛拉特哈密安南庫森吐魯番伊蘭巴里賽瑪
爾堪入貢

四年春正月兩京地震己未大祀天地於南郊二月己
月南京獻騶虞二禮部請表賀不許三月甲戌遣侍郎
李琦等再諭黎利訪立陳氏後夏四月辛巳山雲討平

柳潯蠻戊子命工部尚書黃福平江伯陳瑄經畧漕運
五月壬子錄囚六月甲午罷文吏犯贓贖罪例己亥寇
犯開平鎮撫張信等戰死庚子命薛祿為鎮朔大將軍
督餉開平秋七月己未幸文淵閣八月己卯起復楊漕
癸未定勾軍法九月癸亥釋顧興祖於獄冬十月庚辰
幸文淵閣癸未以天寒諭法司錄囚丙戌製猗蘭操賜
廷臣諭以薦賢為國之道庚寅張瑛陳山罷甲午閱武
於近郊乙未獵於谷口戊戌還宮十一月癸卯命薛祿

及恭順侯吳克忠帥師巡宣府十二月乙亥京師地震
壬辰罷中官松花江造船是年瓜哇占城琉球榜葛刺
哈密吐魯番伊蘭巴里賽瑪爾堪入貢

五年春正月癸丑大祀天地於南郊戊辰尚書夏原吉
卒二月壬辰罷工部採木癸巳頒寬卹之令省災傷寬
馬政免逋欠薪芻招流民賜復一年罷採買減官田舊
科十之三卹工匠禁司倉官包納戒法司慎刑獄乙未
奉皇太后謁陵三月戊申道見耕者下馬問農事取耒

三推顧侍臣曰朕三推已不勝勞况吾民終歲勤動乎
命賜所過農民鈔已酉還宮辛亥李琦還黎利稱陳氏
無後上表請封丙辰免山西去歲被災田租丁巳賜林
震等進士及第出身有差夏四月戊寅命薛祿帥師葉
赤城鵬鶚雲州獨石圍山城堡五月癸卯追奪賊吏誥
敕著為令丙辰修預備倉出官錢收羅備荒癸亥擢郎
中況鍾御史何文淵等九人為知府賜勅遣之六月己
卯遣官捕近畿蝗諭戶部曰往年捕蝗之使害民不減

於蝗宜知此弊因作捕蝗詩示之秋七月癸亥甄別守
令八月己巳朔日食陰雨不見禮官請表賀不許九月
丙午擢御史于謙長史周忱等六人為侍郎巡撫兩京
山東山西河南江西浙江湖廣乙卯巡近郊乙未還宮
冬十月乙亥阿魯台犯遼東遼海衛指揮同知皇甫斌
力戰死丙子巡近郊己卯獵於盆道丙戌至洗馬林遍
閱城堡兵備壬辰還宮十二月癸巳庫森叛番平閏月
己未敕內外諸司久淹獄囚者罪之是年占城琉球瓜

哇衛拉特哈密罕東吐魯番賽瑪爾堪伊蘭巴里八貢
六年春正月丁丑大祀天地於南郊庚辰大雨雷電二
月丁酉命侍郎羅汝敬督陝西屯田己亥濬金龍口引
河達徐州以便漕三月乙亥命吏部考察外官自布政
按察二司始著為令夏四月己酉命侍郎柴車經理山
西屯田五月乙丑黎利遣使謝罪貢方物六月己亥遣
使詔黎利權署安南國事秋七月己巳錄囚壬辰許朶
顏三衛市易冬十月甲辰陳懷平松潘蠻十一月丙子

始命官軍免運民糧乙酉分遣御史往逮貪暴中官袁
琦等十二月乙未袁琦等十一人棄市榜其罪示天下
丁未金幼孜卒庚戌遣御史巡視寧夏甘州屯田水利
是年琉球衛拉特哈密蘇門答刺伊蘭巴里入貢

七年春正月辛酉朔日有食之免朝賀癸酉大祀天地
於南郊二月甲午以春和諭法司錄囚三月庚申朔下
詔行寬卹之政辛酉諭禮部曰朕以官田賦重十減其
三乃聞異時蠲租詔下戶部皆不行甚者戒約有司不

得以詔書為辭是廢格詔令使澤不下究也自今令在必行毋有所遏夏四月辛丑免山西逋賦壬寅募商中鹽輸粟入邊六月癸卯錄囚癸丑罷中官八番市馬是月作官箴成凡三十五篇示百官秋八月乙未敕百官三品以上舉才行文學之士吏部都察院黜方面有司不職者九月庚午命諸將巡邊是秋免兩畿及嘉興湖州水災稅糧十一月辛酉召督漕平江伯陳瑄侍郎趙新等歲終至京議糧賦利弊是年占城琉球哈密喇

衛拉特伊蘭巴里入貢

八年春正月丁卯大祀天地於南郊二月壬子錄囚宥
免五千餘人三月丙辰賜曹鼐等進士及第出身有差
庚辰諭內外優卹軍士違者風憲官察奏罪之是春以
兩京河南山東山西久旱遣使振卹夏四月戊戌詔蠲
京省被災逋租雜課免今年夏稅賜復一年理冤獄減
殊死以下赦軍匠在逃者罪有司各舉賢良方正一人
巡按御史按察使糾貪酷吏及使臣生事者五月丁巳

總兵官都督蕭授討平貴州烏羅蠻丁卯山雲討平宜
山蠻六月乙酉禱雨不應作閔旱詩示羣臣辛丑詔中
外疏決罪囚是夏復振兩京河南山東山西湖廣饑免
稅糧秋七月壬申免江西水災稅糧八月癸巳汰京師
冗官閏月辛亥西域貢麒麟戊午景星見禮官請表賀
皆不許九月乙酉遣官錄天下重囚己亥阿魯台部藏
布寇涼州總兵劉廣擊斬之冬十二月乙亥諭法司宥
京官過犯是年暹羅占城琉球安南滿剌加天方蘇門

答刺古里柯枝阿丹錫蘭山佐法兒甘巴里加異勒忽
魯謨斯哈密衛拉特賽瑪爾堪伊蘭巴里入貢

九年春正月辛卯大祀天地於南郊二月庚戌振鳳陽
淮安揚州徐州饑乙卯申兩京山東山西河南寬卹之
令三月戊寅山雲討平思恩叛蠻夏四月己未黎利死
子麟來告喪命麟權署安南國事戊辰錄囚五月壬午
瘞暴骸秋七月甲申遣給事中御史錦衣衛官督捕兩
畿山東山西河南蝗八月庚戌振湖廣饑甲子勅兩京

湖廣江西河南巡撫巡按御史三司官行視災傷蠲秋糧十之四乙丑罷工部採辦己巳衛拉特托歡攻殺阿魯台來告捷九月癸未自將巡邊乙酉度居庸闕丙戌獵於空道乙未阿魯台子諤博爾濟延來歸丁酉至洗馬林閱城堡兵備己亥大閱冬十月丙午還宮丙辰都督方政討平松潘蠻甲子罷陝西市馬丁卯兩畿浙江湖廣江西饑以應運南京及臨清倉粟振濟十一月戊戌停刑庚子免四川被災稅糧十二月甲子帝不豫衛王

瞻埏攝享太廟是年暹羅占城琉球蘇門答刺哈密衛
拉特入貢

十年春正月癸酉朔不視朝命羣臣謁皇太子於文華
殿甲戌大漸罷採買營造諸使乙亥崩於乾清宮年三
十有八遺詔國家重務白皇太后丁酉上尊謚廟號宣
宗葬景陵

贊曰仁宗為太子失愛於成祖其危而復安太孫盖有
力焉即位以後吏稱其職政得其平綱紀修明倉庾充

美閭閻樂業歲不能災蓋明興至是厯年六十民氣漸
舒蒸然有治平之象矣若乃強藩猝起旋即削平掃蕩
邊塵狡寇震懾帝之英姿睿畧庶幾克繩祖武者歟

明史卷九